

Аёл кишининг намоздаги либоси

05:00 / 09.01.2017 4404

Умму Салама розияллоҳу анҳодан ривоят қилинади:

«Аёл киши қандоқ кийимда намоз ўқийди?» деб сўралди. У киши: «У химорда ва бутун жисмини тўсиб икки қадамнинг устини бекитиб турадиган кўйлакда намоз ўқийди», дедилар».

Шарҳ: «Химор» аёл кишининг боши ва кўксини тўсиб турадиган рўмолга ўхшаш нарса.

Демак, аёл киши юзидан бошқа жойини очмайдиган кийим кийиб намоз ўқиши керак.

Яна ўша кишидан ривоят қилинади:

«Набий соллаллоҳу алайҳи васалламдан:

«Аёл киши кўйлак ва химор ила лунгисиз намоз ўқиса бўладими?» деб сўрадим. У зот:

«Агар кўйлак бутун жисмини тўсиб, икки қадамнинг устини бекитадиган бўлса, бўлади», дедилар».

Иккисини Абу Довуд ривоят қилган.

Шарҳ: Бу ривоят олдингисини таъкидлаб келмоқда.

Оиша розияллоҳу анҳодан ривоят қилинади:

«Набий соллаллоҳу алайҳи васаллам:

«Аллоҳ ҳайз кўрувчининг намозини фақат химор ила қабул қилади», дедилар».

Абу Довуд ва Термизий ривоят қилган.

Шарҳ: Демак, аёл киши боши ва кўксини тўсиб турувчи кийим ҳамда рўмолсиз намоз ўқиши мумкин эмас.